

Tuntutan Filipina ke atas Sabah dibahas Dewan Negara

BH 7.9.2020

September 7, 2020 @ 7:27pm



Mengikut sejarah rakyat Sabah sendiri sudah menentukan hak mereka supaya negeri itu berada dalam Malaysia dan perjanjian Cobbold mengesahkan aspirasi ia sebahagian Malaysia.
FOTO BERNAMA

KUALA LUMPUR: Persidangan Dewan Negara hari ini membahaskan usul tergepar isu tuntutan Filipina terhadap Sabah yang dikemukakan oleh Senator Adrian Lasimbang di bawah Peraturan Mesyuarat 17 (1).

Yang Dipertua Dewan Negara Tan Sri Dr Rais Yatim membenarkannya dan perbahasan bermula 4.30 petang mengikut Peraturan Mesyuarat 17 (3) dengan pihak pencadang dibenarkan berbahas selama 30 minit dan diikuti pihak kerajaan menjawabnya dalam masa 30 minit.

Turut mengambil bahagian dalam perbahasan isu itu ialah Senator Datuk Paul Igai, Senator Alan Ling Sie Kiong, Senator Raj Murni Sabu dan Senator Liew Chin Tong.

Terdahulu, dalam pemberitahuan bersurat, Adrian Lasimbang mohon persidangan ditangguhkan mengikut peraturan mesyuarat 17 (1) bagi membahaskan berkenaan tuntutan Filipina terhadap Sabah melalui pengeluaran peta yang menyatakan bahawa negeri itu adalah sebahagian Wilayah Filipina.

"Ini adalah satu tindakan provokatif yang menggugat dan mencabar kedaulatan undang-undang Malaysia dan Sabah yang berada dalam Persekutuan Malaysia," katanya.

Menurut beliau, usul berkenaan adalah perkara yang mustahak bagi kedaulatan negara dan satu pelanggaran terhadap kerjasama serantau melalui ASEAN serta melanggar undang-undang perjanjian di peringkat Pertubuhan Bangsa-Bangsa Bersatu (PBB).

Oleh itu usul berkenaan perlu disegerakan kerana sebarang tindakan mempersoal kedaulatan Malaysia adalah satu isu keselamatan yang tidak boleh diambil ringan.

Dalam sesi perbincangan usul itu, Adrian berkata isu tuntutan Sabah oleh negara itu bukan perkara baharu namun hal itu ditimbulkan semula pada 20 Ogos lalu setelah Dewan Perwakilan Filipina mengesyorkan peta Sabah dipamerkan dalam pasport negara berkenaan.

"Perkara ini membawa implikasi sangat besar, sungguh ia hanyalah peta tetapi dari segi perbuatan ia adalah satu pengkhianatan dan tidak harus dikompromi," katanya.

Beliau turut meminta satu kajian sejarah Sabah dilakukan secara terperinci bagi memastikan kerajaan mempunyai fakta dan dokumen lengkap untuk menangkis tuntutan yang dilakukan oleh negara itu.

Adrian menyarankan kerajaan supaya menyalurkan satu peruntukan khas kepada Universiti Malaysia Sabah bagi membolehkan kajian itu dilakukan.

Selain itu beliau turut meminta kerajaan supaya tidak mengiktiraf pasport Filipina yang memaparkan peta Sabah dan menghalang mereka yang menggunakan dokumen itu daripada memasuki negara ini.

Semasa menjawab isu berkenaan, Timbalan Menteri Luar Datuk Kamarudin Jaffar berkata Sabah adalah hak Malaysia dan ia sudah dibuktikan sejak sekian lama menerusi perjanjian Cobbold selain hak itu diiktiraf PBB.

Beliau berkata, oleh itu tidak relevan sekiranya ada mana-mana pihak asing termasuk Filipina menuntut hak ke atas Sabah.

"Isu tuntutan ini adalah tidak berasas dan tidak relevan kerana Sabah adalah hak Malaysia berdasarkan fakta sejarah lalu.

"Mengikut sejarah rakyat Sabah sendiri sudah menentukan hak mereka supaya negeri itu berada dalam Malaysia dan perjanjian Cobbold mengesahkan aspirasi ia sebahagian Malaysia," katanya.— BERNAMA